



Äinewääg e Zeedel 2021

Jede Frytig bescheert ys s BAG Corona-Zahle-Quale.
Die Zahle sy öbbe glyych genau wie myni Lottozahle.
Mii beriert daas alles nid, was s BAG do gseht.
Dank myne zwanzig Chie gniess iich: Härdeimmunität.

Wäg däm Lockdown ha au iich e Hamschter-Yychauf gmacht.
Y ha yykauft für drei Möönet, für s Zmorge, s Zmittag, s Znacht.
My Büüsi macht nid mit. Unterstützig? Chasch vergässe!
Äs het bereits am dritte Daag scho all die Hamschter grässe.

Y gang jetzt nüm in Soustall. Näi, daas mach y sicher nid.
Y halt Abstand, wel s im Soustall, die mäischte Vyyre git.
Sy sääge s immer wiider, jetzt zellt vor alle Ding:
Wäschet d Händ und unbedingt Soustall-Distansing.

Maske trääge in dr Schuel, im Chindsgi bruuchsch se nid.
In de Restaurant bruucht s käini. Do chumm iich scho lang nüm mit.
Bim Coiffeur bruucht s e Maske. Checksch d Logik vom Bundesroot?
Dasch wel dr Berset gärn in d Bäiz, aber nie zum Coiffeur goht.

Y besprich my Faasnachtslichte mit em Groosi und em Chalb.
Mäischstens scho uf em Heimwääg uf Buckte zrugg vo dr Alp.
Bi „Sforza Trainer vom FCB“ het s Chälbli zimlig gmotzt.
Bi „Burgener“ het s denn verzwyfflet in Vehtransporter kotzt.

Mi dunkt s, dä Chäibe-Virus, isch wirklich schampar gscheit.
Uf dr ganze Wält sy alli, uf dä Chääfer yynegheit.
Mir Schwyzer, miir sy schlauer, mr wäärde wältwyt drum beniide.
Bi eus, do isch dä Virus, vo Kanton zu Kanton verschiide.

Bauer sucht Frau isch total out. Telefonsex isch z tüür.
Drum laad iich mir die Covid-App, für die zahlsch käi Gebühr.
Y mäld, y häig dr Hueschte, dr Gschmacksinn syygi gstöört
So chumm y dääglig, choschetloos zu me Contact-Tracing-Flirt.

My Hoofhund het Symptom. Y sperr en in Chäller aabe.
Zäh Dääg Quarantäne zwüsche Ratte, Müüs und Schaabe.
Wo en ufehool, durfroore, cha dä arm Gsell nümme bälle.
Y sperr en nomol aabe. Dä het glaub die zwäiti Wälle.

Y kenn e Chind, wo Sydney häisst. Paris häisst sy Schweschter.
Dasch wel me die döört gmacht het, erklärt mr s Groosi geschter.
Wäisch Heiri, die mache hüt, wäg jeedem Räisli grad e Gschyss.
In Gälterchinde git s e Buschi, daas häisst Home-Office.

Sit letscht Jahr chasch Viagra ganz ohni Rezäpt bezieh.
Y gib daas jetzt mym Muuni zur Freud vo myne Chie.
Dr Ängelbärger nimmt s glaub au. Macht ihn das unbeschweeter?
Näi, s macht d Corona-Reegle für d Baasler dütlig härter.

Jetzt mache sy z Baasel d Bäize zue. S Baaselbiet blybt offe.
Anschyynend häit diir z Baasel ohni Abstand gsoffe.
Miir Baaselbieter syy halt braav. Miir syy mit eus im Reine.
Miir sy dehäi und wär nid folgt, dä schicke miir in d Steine.

Dr Blocher Christoph het verzichtet. Er wott käi Ruheghalt.
Spööter will er doch dä Pulver, äifach so, so isch dääh halt.
D Frau Ackermäa bruucht käi so Ghalt. Sy het e Job e neue:
Sy chunnt diräkt nach iirer Abwahl bi miir cho wyterheue.

Dr Ruedi, dääh vom Nochberhoof, dä ghöör y letschti sääge:
S isch völlig richtig, dass me muess im Puff e Maske trääge.
Muesch äifach richtig plaane, sunscht verliersch e viertel Stund,
bis de sicher wäisch was oobe und was unde aane chunnt.

Schyyfahre über d Wiehnacht? Näi loos, daas mach y nid!
Wäisch Sophie, säit dr Guschti, Corona fahrt im Bähnli mit.
Die mäischte wärde glych goo! Dasch miir glyych my liebe Schatz.
Wäisch dank deene het s im nägschte Jahr uf dr Pischte vil me Platz.

Am Rhyboord, dört stohd neuerdings, e Mischtchüübel-Roboter.
Dä macht Strom, cha prässe, häggsle. Sogaar s Hundegüggli wot er.
D Frau Merian isch begäischeret: Die Apparäät, die sin e Pracht.
Y ha geschter deert mit so me Ding e Impftermin abgmacht.

Y ha bi myne schöne Chie nie an Corona dänkt.
Sy frässe jeede Daag vil Heu und furze unbeschränkt.
Sy mache alli glücklich Muh, jeedi het e äigene Doon.
D Flora macht jetzt häiser Muh, y hoff dasch nid die Muhtation.

Corona-Tescht-Analabstrich daas mache jetzt d Chinesee.
E Wattebausch ins Fudi, s goht schnäll, git wenig Speese.
Dä Tescht goht nid für jeede, für e Trump dä Syydebolle,
bruucht me statt me Wattestäabli sächzäh Watterolle.

Käini Schnitzelbänk am Fäärnseh, het dr Engelberger gsäit.
Miir blybe stolz und kreativ, ha iich miir überlääit.
Miir filme alli Schnitzelbänk im oobere Baaselbiet.
Miir döörfe daas, s isch alles save, miir syy e Schyygebiet!

